



Inatsisartunut ilaasortaq
Knud Fleischer
-/maani

**Inatsisartunut ilaasortap Knud Fleischerip, Kattusseqatigiit Partiiat, § 37 naaper-
torlugu apeqqutaasa allakkatigut akineqarnerat**

03. feb 2012
Sagsnr. 2012-060994
Dok. Nr. 817898

**Peqqinnissaqarfiup sullissinera kiffartuussineralu pillugit Naalakkersuisunut a-
peqqutit**

Postboks 1160
Tlf: 34 50 00
Fax: 32 55 05
3900 Nuuk

Inatsisartunut ilaasortap apeqqutaanut qujavunga.

Email: pn@nanoq.gl
www.nanoq.gl

Makku apeqqutigineqarput:

1. **Peqqinnissaqarfiup innuttaasunut kiffartuussinera pillugu nutarterineq qanoq ingerlava sumullu killippa ?**
2. **Peqqinnissaqarfiup iluani qarasaasiatingut system-i qanoq isikkoqarpa? Taassuma ataani qaqungu system-i iluarsineqassua?**
3. **Peqqinnissaqarfimmiit sullinnerlunneqarsimaneq pissutigalugu naamma-
ngittaalliortartut amerliartorpaat?**
4. **Napparsimasup ilaqutaasa angalanermut ikorneqarsinnaaneranut periar-
fissat suuppat?**
5. **Naalakkersuisut qanoq ittunik pilersaaruteqarpat, Peqqinnissaqarfimmut
anigaasartuuterpassuit ikilisarniarlugit? Taassuma ataani innuttaasunik
sullissineq pitsaanerusoq anguniarlungu?**
6. **Danmark-imut nunanulluunniit allanut aallartitsisariaqartarnerit qanoq an-
nertutingisumik anigaasartuutaasarpat ? taassuma ataani misissuiffingi-
neqarsimappat? Taamaangippat misissuiffingineqarniarpat?**
7. **lisartakkanik tunniussisarneq agguasarnarlu nunarput tamakkerlungu,
kukkusumik tunniussinnginnissaq siunertarlungu qanoq peqqinnissaqar-
fiup iluani anguniangaqartoqarpa?**

1-imut)

Innuttaasunut kiffartuussinerep ajunnginnerusumik ingerlalernissaa qulakkeerniarlugu Peqqinnissaqarfik pilersaarutininik arlalinnik suliniuteqarpoq:

- Tamanna pissaq peqqinnissaqarfiup aqqissuussaananermigut iluarsartuunneqarne-
ra aqqutigalugu, tassani ilaatigut suliasatut piumasarineqartut allattorsimaffii sulia-
rineqarput, nunap immikkoortuini napparsimmavinni, peqqissaavinni nunaqarfinnilu
nakorsiartarfinni peqqinnissaqarfiup sullissinerisa aalajangersarneqarlutillu assigii-
lernissaat siunertarlugu.

- Maalaaruteqartarfimmik pilersitsisoqarsimavoq innuttaasut kikkulluunniit peqqinnissaqarfiup kiffartuussineranik naammaginninngitsut maalaarutaannik suliarinnittar-nissamik qulakkeerinnittumik.
- Peqqinnissaqarfimmi oqaloqatigiinnikkut isumaqatigiissutinik kiffartuussinermi na-korsaanermilu anguniagassanik aalajangersaaffiusunik Peqqjissutsimut Pitsaaliui-nermullu Aqutsisoqarfiup aamma nunap immikkoortuini aqutsisut akornanni isuma-qatigiissuteqartoqartarpoq.
- Innuttaasunik misissuinerit naapertorlugit napparsimasut naammagisimaarinninne-rannik misissuineq.
- Telemedicinip piviusunngortinneratigut anguniarneqarpoq peqqinnissaqarfiup kiffar-tuussinerisa ajornannginnerulemmissaat, tamannalu nunatsinni tikikkuminaannerpaa-ni najugaqartut tunngaviumik misissorneqarnissaannut ajornannginnerulersitsi-voq.
- Aningaasanut inatsimmi aningaasanik immikkoortitsisoqarpoq, suliaritittussaallutik utaqqisut malunnartumik ikilisinneqarsinnaaniassammata.

Suliniutit aallartinneqareersut tamakku saniatigut qarasaasiatigut napparsimasunik na-lunaarsuiffimmik siunissami atuilemmissaq siunertaralugu aallarniutaasumik misissueq-qissaarnermik massakkorpiaq ingerlatsisoqarpoq, tamannalu PAT pillugu iliusissami (Paasissutissiineq Attaveqatigiinnerlu pillugit Teknologi) allaaserineqarpoq, innuttaasullu kiffartuunneqarnerat pitsaanerpaanngortissinnaallugu.

2-mut)

Sullissineq eqqarsaatigalugu peqqinnissaqarfimmi IT-qarnermi atortorissaarutitut tun-ngasumik sullissineq Nuummi qitiusumik isumagineqarpoq, tamaanilu IT-mut immikkoor-tortaqarfiup Kalaallit Nunaanni peqqinnissaqarfimmi atortorissaarutit najukkallu tamak-kerlugit isumagisaralugit. Tamanna ajunngitsumik aaqqissuussinertut isigineqarpoq, ta-matumani piginnaasat ataatsimoortinneqarnerisigut sullissineq pitsanngoriartinneqarsi-mammata.

Atortorissaaruteqarnerup tungaatigut peqqinnissaqarfik Kalaallit Nunaat tamakkerlugu attaveqaatit tungaasigut matoqqasumik suliaavoq, atortorissaarutillu amerlanerpaat Nuummiit aqunneqarlutik.

Peqqinnissaqarfimmi tunngaviumik atortorissaarutit pitsaassutsimikkut ajunngaat, ingerlaavartumillu aserfallatsaaliorneqarlutik. Tunngaviumik atortorissaarutini unam-inartut annertunerpaat attaveqaatiniipput, taakkulu 2012-imi kingusinnerusukku IP telefonimut pilersaarutit malillugit allanngortitsinissaq ikiuuffigisinnaanngilaat. Tamanna 2012-imi ukiup affaani siullermi attaveqaatit annertuumik qaffassarnerisigut ikiorserne-qassaaq. Allanngortitsinissaq missingersuusiorneqareerluni, pilersaarusiorneqareerluni-lu inniminnerneqareerpoq, tassungalu atatillugu annertunerusunik ajornartorsiuteqarnis-saq ilimagineqarani.

3-mut)

Peqqinnissaqarfik ukiuni kingulliunerusuni kiffartuussinermut maalaarutinik ima amerla-tigisunik tigusaqarpoq:

2007	2008	2009	2010	2011	2012
4	11	29	18	37	5

Kisitsisit 2011-mi qaffasinnerupput, atorfiup 2010-mi inuttaqannginneranik pissuteqartumik suliassat uninngaannarsimmata.

4-mut)

Nappaammik toqussutaasinnaasumik napparsimasunik angallassigasuartoqartillugu qanigisamik ingiaqateqarsinnaaneq Kalaallit Nunaanni Peqqinnissaqarfimmi periarfissaavoq. Nakorsap qaqugukkulluunniit passussisup aalajangissavaa nappaat ilumut toqussutaasinnaanersoq. Kalaallit Nunaanni Peqqinnissaqarfiup najugaqartitsinermut nerisaqartitsinermullu pisussaaffii unissapput napparsimasup napparsimamera toqussutaasinnaajunnaartutut nalilerneqarpat. Tamatuma kingorna ingiallortaasup najugaqarnini nerisassanilu nammineq isumagilissavai. Inuusuttut 18-it inorlugit ukiullit qanigisamik ataatsimik ingiallorteqarnissamut tamatigut pisinnaatitaaffeqarput.

Napparsimasut ingiallorteqartarnerat pillugu nassuiaammik UKA 2012-imi saqqummiussissaanga.

5-imut)

Peqqinnissaqarfiup 1.1.2012-imi aallartittumik Region Hovedstaden nutaamik isumaqatigiissuteqarfigaa. Isumaqatigiissummi Region Hovedstaden-imi tamarmi kalaallinik napparsimasunik nakorsaasarnermut *akileeriaatsip* allanngortinnissaa pineqarpoq. Nutaamik isumaqatigiissuteqarnerup kinguneraa Region Hovedstadenimi/Rigshospitalimi kalaallinik napparsimasunik sullissinernut akiliuteqartarnek nakorsarneqarnerup soorpiarneranut naapertuuttunngortinneqassammat. Region Hovedstaden-imik nutaamik isumaqatigiissut aningaasartuutit qaffasissusiinut malunnartumik appariartunut kisimi sunniuteqarpoq. Innuttaasut kiffartuunneqarnerat allannguuteqanngilaq.

Tamatuma kingunerisaanik peqqinnissaqarfimmi missingersuutini amigartooruteqarnerit 8 mio. kr.-inik ikilisarneqarnissaat siunertaralugu peqqinnissaqarfiup missingersuutaasa sukannernerusumik aqunneqarnissaat suliniutigineqalerpoq. Ilutigitillugu 2012-imut missingersuutit ukiullu missingersuusiorfiusut 8,4 mio. kr.-inik ikilisinneqarput. Taamatut sipaarniarneq napparsimasut sullinneqarnerannut tunngasuunnginnerusuni pissaaq.

6-imut)

2012-imut Aningaasanut Inatsimmi napparsimasut nunani allani katsorsartinnissaannut makku aningaasaliissutigineqarput:

Konto pingarneq 34.11.01 Napparsimasut nunani allani katsorsarneqartarnerat, timikkut nappaatit	125.423.000 kr.
Konto pingarneq 34.11.02 Napparsimasut nunani allani katsorsarneqartarnerat, tarnikkut nappaatit	34.948.000 kr.
Napparsimasut nunani allani katsorsarneqartarnerat katillugit	160.371.000 kr.

Taakku saniatigut Danmarkimi Kalaallit Peqqissartut Angerlarsimaffiata ingerlanneranut aningaasartuutit 2012-imi 29.784.000 kr.-inik annertussuseqartut. Aningaasaliissutit konto pingarnermi 34.11.04-imi, Kalaallit Peqqissartut Angerlarsimaffiannut kontomi, takuneqarsinnaapput.

Danmarkimi Islandimilu napparsimasunik nakorsaanerit qanoq akeqarneri imminnut nal-lersuullugit maannakkut misissuisoqarpoq.


7-imut)

Kukkusumik nakorsaasersuisarneq peqqinnissaqarfimmi sumiluunniit pisinnaavoq – u-ninnganermi, nakorsiarnermi, nakorsaataasivimmiillu tunniussisoqarnerani. Pingaartu-mik uninnganermiit najukkami nakorsamut misissortikkiartornermut atatillugu tamanna pingaartumik pisarpoq.

Peqqinnissaqarfiup kukkusumik nakorsaasersuisarnerit qitiutillugit isiginiarpai, kukku-sumillu nakorsaasersuisarnerit pinngitsoortinniarlugit suliniutinik arlalinnik aallartitsisi-malluni.

Kukkusumik nakorsaasersuisarnerit pinngitsoortinnissaannut sakkusaaq pingaarner-paaq tassaassaaq EPJ-imik (qarasaasiatigut napparsimasunik nalunaarsuiffik) atuilerneq. EPJ-ip atulerneratigut napparsimasooq **ataasiinnarmik** nakorsaatinut allagartaqas-saaq, napparsimasooq D.I.N.-imi sinerissamiluunniit uninngippat, nakorsanit malittarine-qarpat imaluunniit peqqissilluni piffissap ilaannaatigut nakorsaatinik pisariaqartitsippat.

Inussiarnersumik inuulluaqqusillunga


Agathe Fontain



Kattusseqatigiit Partiiat

20 januar 2012

Inatsisartut suleriaasianni § 37 naapertorlugu apeqquteqaat imaattoq Naalakkersuisunut ingerlateqqippara:

Naalakkersuisunut apeqqutit:

1. Peqqinnissaqarfiup innuttaasunut kiffartuussinera pillugu nutarterineq qanoq ingerlava sumullu killippa ?
2. Peqqinnissaqarfiup iluani qarasaasiatingut system-i qanoq isikkoqarpa? Taassuma ataani qaqungu system-i iluarsineqassua?
3. Peqqinnissaqarfimmiit sullinnerlunneqarsimaneq pissutigalugu naammangittaalliortartut amerliartorpaat?
4. Napparsimasup ilaquataasa angalanermut ikorneqarsinnaaneranut periarfissat suuppat?
5. Naalakkersuisut qanoq ittunik pilersaaruteqarpat, Peqqinnissaqarfimmut aningaasartuuterpassuit ikilisarniarlugit? Taassuma ataani innuttaasunik sullissineq pitsaanerusoq anguniarlungu?
6. Danmark-imut nunanulluunniit allanut aallartitsisariaqartarnerit qanoq annertutingisumik aningaasartuutaasarpas ? taassuma ataani misissuiffingineqarsimappat? Taamaangippat misissuiffingineqarniarpat?
7. Iisartakkanik tunniussisarneq agguasernerlu nunarput tamakkerlungu ,kukkusumik tunniussinnginnissaq siunertarlungu qanoq peqqinnissaqarfiup iluani anguniangaqartoqarpa?

(Inatsisartunut ilaasortaq Knud Fleischer, Kattusseqatigiit Partiiat)

Tunngavilersuut:

Innuttaasunik peqqinnissaqarfimmiit sullinneqarneq pillungu, naammangittaalliutit aammalu paaserusutat tunngavingalungit apeqqutit qulaani taaneqartut Kattusseqatigiit Partiianniit ingerlateqqippangut.

Naluneqanngimmat innuttaasut akornanni peqqinnissaq, naalakkersuisuniit pimoorullungu anguniarneqartoq.

Apeqqutit ullut qulit iluini akineqarnissaat kissaatingalungu apeqquteqaatit nassiuppangut.